

四庫全書

集部

欽定四庫全書

文敬集卷十七

明 楊榮 撰

神道碑銘

開國輔運推誠宣力武臣柱國武定侯贈營國
公謚威襄郭公神道碑銘

洪惟太祖高皇帝龍飛淮甸應天順人芟刈羣雄戡定
海內一時智勇材力之臣感會風雲效其忠勤輔成帝
業開千萬載太平之運竒勲偉績鏗鉤振燿勒銘鼎彝

垂光竹帛與國家相為無窮猗歟盛哉予嘗叨職國史
竊觀開國勲臣其間能身躋壽考世為貴戚子孫享有
顯爵久而益盛者不數人豈非其存心之仁與積累之
厚有間耶若營國威襄公蓋足徵焉公姓郭氏諱英臨
淮人生有異徵沉毅多智身長七尺膂力過人尤精騎
射年十八從太祖起義兵甚見親信每令直宿帳中取
徐泗滌和采石太平建康鎮常寧國諸郡屢立戰功上
嘗以郭四呼之上親征偽漢陳友諒大戰鄱陽湖相持

連晝夜公時金瘡未瘳力疾鏖戰敗賊於禁江口已而友諒中流矢死有言公之功者上問之公曰天威神筭臣何力焉上益重之時友諒子理復立於武昌進軍攻之其將陳僉同者驍捷善禦馳入中軍帳下上方坐胡牀遽呼公曰郭四為吾殺賊公持鎗躍馬奮臂一呼賊應手殞墜上解所御赤戰袍衣之曰唐之尉遲敬德不汝過也授驍騎衛管馬軍千戶從征襄陽克淮安鳳陽安豐陞宣武將軍驍騎左衛指揮僉事洪武元年戊申

從大將軍徐公北定中原下齊魯克汴梁平河南取元都破潼關彰德廣平所至有功初大將軍遣公取通州公距城三十里為營深溝高壘為持久計衆請速攻之公曰吾師遠來敵以逸待勞攻城非我利也宜出其不意破之翌日大霧公以千人伏道傍率精騎三千直抵城下元將諤斯巴國公帥敢死士萬餘張兩掖而出與戰良久公佯敗彼乘勝來追伏兵中起截其軍為兩道斬首數千級擒元宗室博囉梁王遂克通州元軍乃北

遁克永平真定州生擒守將湯同僉復從平章常公
取太原守將王保保軍於城西公憑高望之謂常公曰
彼兵多而不整營大而無備請夜劫之常公深然其計
遣五十騎伏城東十里以舉火鳴砲為期至夜公率十
餘騎潛入其營舉火鳴砲伏兵亦舉火鳴砲常公引兵
繼至鼓譟之聲相接保保軍大潰自相屠戮乃棄城遁
下興州大同至沙淨州生擒偽將竹平章渡河取鹿臺
西安鳳翔鞏昌追敗賊將賀宗哲於亂山庚戌陞本衛

指揮副使從征迤西克定西討西夏察罕諾爾撫安呼
沁平章沙淨州復叛討平之克登寧州斬首二千級獲
牛馬數千陞昭勇將軍本衛指揮使賜金龍衣一襲辛
亥陞驃騎將軍河南都指揮使將赴鎮皇寧妃公之女
弟也上遣至公第餞之且謂公素清儉賜白金二十鑿
廐馬二十二匹時河洛新罹兵燹邑井蕭條居民艱食
盜賊充斥公宣布威德綏輯流亡申寬條明賞罰遠邇
來歸者日以千計未期年戶口倍增境內大治丙辰移

鎮北平河南士女不忍其去遮公馬數十里不得行甚
至泣下既去為立生祠北平初定所在反側不寧公開
示誠款諭以理亂禍福人心遂安元左丞何允中等聞
公之德來降者凡九千餘人上遣使勞以上尊羊馬授
龍虎將軍北平都指揮使賜誥命逾四年召還京進大
都督府僉事更定官制改前軍都督府僉事灰山賊反
承命討平之賜馬七匹辛酉從潁川侯傅公征雲南既
至公及都督陳桓胡海分道進討道多險隘諸將欲深

入公曰破敵貴先聲攻取必自近始舍近趨遠豈策之上耶遂先攻赤水河路距河二十里為營時久雨河水暴漲公曰賊恃水漲不意吾濟下令諸軍斫木造筏夜半濟河比曉賊始覺遂大潰生擒烏撒并阿容諸蠻由是雲南諸賊破膽進攻曲靖六梁州闕索嶺及偽石元帥山寨皆克之至江川椅子寨寨依山公先遣騎兵五千攻其前賊空寨迎戰復以精騎數百擣其後斬門而入火砲連發烈焰漲天賊乃亂悉破滅之進攻大理金

齒降其偽官段平章攻安寧州賊將布哈特穆爾棄城
走破富民縣山寨攻靖寧州蠻七寨一日夜破之攻牢
撞山寨取仁德府破哨店山寨圍姚安敗賊將李自久
平蒙化州鄧川州破三營復光寨過金沙江攻北勝府
生擒賊將高生平麗江府平津等州前後斬首一萬三
千餘級生擒二千餘人收精兵人馬數萬船千餘艘蠻
民降者數十萬戶雲南諸路平論公功進爵開國輔運
推誠宣力武臣柱國武定侯賜誥券食祿二千五百石

子孫世世承襲乙丑加靖海將軍鎮守遼東丁卯同大將軍宋國公馮公討北敵納克出降之師旋敵將追襲之公與戰創傷左脇箭復中右脇公佯呼敵傷吾甲我衆益奮連戰數十合寇遂却已而進征邊右副將軍仍鎮遼東戊辰出討北寇至捕魚兒海邏騎偵敵營不遠公乃令諸軍少憩飲馬銜枚卷甲倍道而馳直抵敵營敵人覺乃率十餘騎潰圍出其將曼濟太尉來拒我師公手刃之獲兩營所積金寶珍玩圖書降其衆五萬餘

人生擒敵將約約司徒納木囊嘉卜太尉繖固達勒袞布達
拉王子等四萬餘人馬駝萬五千匹牛羊輜重無筭師
還賜白金千兩鈔八百錠綵幣四十匹已已上以天下
無事且憫諸將老欲保全之厚加賜賚遣歸其鄉公亦
就遣庚午獨召還京上賜坐與語歡甚命統禁兵及在
京諸軍蓋上春秋高知公忠謹特倚重焉辛未以敵酋
阿扎克寔哩寇邊命公討之獲其人口孳畜逐北至雅寒
山而還丁丑川陝寇發勢張甚上顧曰非卿無能勝其

任者授征西將軍印討之至沔之後河生擒賊首高福興及黨四千餘人公䟽其同謀者請誅之脅從者乞勿治且言有司不恤民宜正其罪上可之永樂元年癸未二月十七日卒于家享年六十有九訃聞太宗文皇帝為之震悼輟朝二日遣官致祭賻卹有加贈營國公謚威襄賜葬京師聚寶山之原公孝友仁慈恭儉誠實出於天性母夫人嘗疾篤懸身燈告天求以身代疾遂愈人皆謂公孝感所致後母夫人卒公廬墓側晝夜號泣

不絕聲卧寢於地毀瘠日甚一夕夢母夫人告曰地濕則致疾致疾則傷生汝固純孝惟竭忠報國為父母光墓不必廬也公感悟而歸家三年之中哀痛如一日平居兄弟怡怡克盡友愛御軍行師動有紀律推心任人甘苦同之其攻克州郡必禁虜掠戒殺降封府庫收簿籍一錢尺帛不敢私嘗北征軍法夜必令親軍更直荷戈環帳立一夕風雪大作公悉罷遣歸營其愛郵軍士多類此家居簡靜好讀書天文地理百家之說靡不通

曉教訓子孫以儉素力學為務事太祖高皇帝三十餘年小心謹慎未嘗有過眷遇雖隆而自處益謙上嘗御便殿賜坐適有奏事者公趨避之上曰卿第坐朕自理事不汝闕也其見敬愛如此時公卿多置田產公獨不治上問之對曰臣一布衣荷陛下寵靈叨有封爵子孫衣食餘饒安敢增益俾生侈心上善之嗟歎良久公大小百餘戰金瘡遍體每陰雨痛甚及聞征討之命即日就道未始以老疾辭其事上竭忠益如此曾祖參祖聚

父山甫累贈營國公曾祖妣何氏祖妣趙氏母單氏贈
營國夫人配馬氏封營國夫人公兄弟四人長早卒次
興以軍功封鞏昌侯贈陝國公謚宣武次某福建都指
揮使次即公也子男十二人鎮銘鏞鑑銓錡鈺鈇鑠
鋼鎗鎮駙馬都尉尚永嘉公主銘遼王府典寶追封武
定侯鏞中軍都督府右都督鑑中都留守司副留守鎗
散騎舍人錡早卒鈺贈承德郎尚寶司丞鈇旗手衛指
揮使女九人長適府軍衛指揮僉事闡瑜次適濟寧衛

指揮使弋某次遼王妃次適府軍衛指揮僉事趙斌次
郢王妃次適金吾右衛指揮同知范聚餘早卒孫男二
十有八琮玪瑋瑯瑄瑾珺瑤瑳瑒玘瑛瑧瑨瑩瑣瑛瑛
餘尚幼琮府軍衛指揮僉事玪襲武定侯瑾早卒珺尚
寶司丞瑤梁王府典寶瑳瑒皆勲衛孫女十六人長仁
宗昭皇帝貴妃次適留守左衛指揮陳鑑餘在室曾孫
男五人聰耽餘尚幼聰散騎舍人予觀前史稱郭汾陽
功蓋天下而主不疑位極人臣而衆不嫉富貴壽考始

終令節七子八婿諸孫數十人俱膺顯仕唐世榮之若
公勲業之隆子孫之盛方之汾陽夫豈多讓皆由公存
心一本於仁故積累之厚愈遠愈隆焉嗚呼偉哉玆以
神道之石未立無以昭示永久來請文予閱其家傳考
定其大者次第之而系之銘曰

天啟皇明淮甸龍飛乘時應運風雲一機太祖受命汎
掃餘孽羣力桓桓鼓勇就列東征西伐北南以平斷出
神聖功協衆能展也郭公有文有武翊輔真主實天界

付鄱陽之戰衆論偉公公仰廟略不有其功既捷通州
再捷太原河南北平黎庶懷恩南詔之征武功尤大誅
叛全生蜀民是賴維彼敵人遠徙漠北卷甲擒之邊塵
蕩滌皇有嘉錫錫爵褒功金書鐵券武定啓封錦袍御
馬白金文綺赫赫高門煌煌戟棨世聯國戚代有顯融
匪幸所致惟公之忠忠在朝廷載之信史亦有孝思永
錫爾類在昔汾陽著勲有唐公實似之于今益彰我作
銘詞勒功墓道百世斯承有赫其耀

故奉天靖難推誠宣力武臣特進榮祿大夫柱
國中軍都督府左都督武安侯追封漳國公
謚忠毅鄭公神道碑銘

宣德甲寅二月乙丑奉天靖難推誠宣力武臣特進榮
祿大夫柱國中軍都督府左都督武安侯鄭公薨于大
同訃聞上嗟悼輟視朝二日遣官致祭賜棺及賻命有
司營葬追封漳國公謚忠毅某年某月某日歸葬北京
之西山婺里其子能既襲侯爵遂具公平生之槩來求

神道碑銘予嘗叨總史職不獲辭乃為序次之曰公諱
亨世家廬州合肥曾祖五乙祖大几父用以公貴俱追
封武安侯曾祖母劉氏祖母張氏母英氏俱追封夫人
昔我太祖高皇帝龍興淮甸公之先君子自和州率先
應募積軍功授平陽右衛百戶陞大興衛副千戶歲癸
亥公始襲父職公天資剛毅純篤壬申出使漠北至鄂
諾河撫輯韃靼還以勞陞密雲衛指揮僉事乙卯秋太
宗文皇帝舉兵靖難命公攻薊州時都指揮馬宣城守

不下公百計破克之遂生擒宣歸旋攻雄縣討真定俱
大克捷陞指揮使及遼東軍圍永平上親率諸將援之
公賈勇奮進敵遂披靡旋師收大寧陞北平都指揮僉
事未幾戰鄭村埧克紫荆關復廣昌所向無前明年庚
辰取蔚州下大同大戰白溝河乘勝逐北直抵濟南陞
都指揮同知滄州之役公軍北門北門芻糧所聚兩軍
必爭之地公力戰破之又明年辛巳敗順德軍於深州
夾河決戰勦戮尤盛藁城西水寨連戰俱捷遂耀兵廣

平略地彰德所至皆下是冬陞中軍都督僉事歲壬午
從上南嚮歷取諸縣及東平汶上等堡對敵小河鏖鋒
靈壁擣泗州取鎮淮渡江克金川門內難既平上正大
統策勲頒爵封公武安侯階勲如前白金文綺襲衣前
後賜賚不可勝計永樂癸巳夏奉命出關巡視山川險
易撫輯軍士時關外軍衛統攝無紀遇有邊警猝難制
敵公因奏調大同前衛帶管東勝等衛措置得宜自是
各衛皆從所議以聽調用尋奉勅領士卒築長安嶺城

規畫有方人不知勞未逾月而城成歲庚寅以來上屢親征朔漠公扈從每著勞績仁宗皇帝嗣位念公舊德特賜佩征西前將軍印充總兵官鎮守大同嚴斥堠固屯守敵人遠遁不敢窺邊居常以清介自將服食之奉泊如也用是下人毋擾邊境輯寧宣宗皇帝倚任尤重屢降璽書褒異之公生元至正丙申至是享年七十有九配夫人張氏子男三人長即能次熙次嘉女二人長適王友賢次尚幼孫男一孫女一於戲自古帝王之興

必有才雄智勇之臣為之左右以戢靖大難垂不刊之功故其子孫亦世有爵邑與國咸休永無窮之聞若公遭遇太宗竭誠效力奮不顧身崎嶇戰陣以佐助翊戴奠安宗社迨扈從北征鎮安邊陲其竒能偉績輝映後先者何其盛哉是宜勒銘豐碑昭示後世焉銘曰

於皇太宗有臣忠毅克殫心膂助順舉義崎嶇戰陣奮不顧身祇奉神謀用成大勲皇帝曰吁有臣如是惟天所生皇考所遺從征漠北屢效驅馳出鎮邊陲敵不敢

窺長安之嶺其城萬堵營之築之士不知苦盛福遐齡
逮事四朝功成不有位高不驕天不憖遺殞傷元老時
論興嗟聖情悲悼聖情悲悼慨念元功式昭褒典賜謚
追封婺里之原西山之麓鬱鬱松楸佳城是卜紀行有
史銘功有詞後百千祀視此豐碑

故奉天翊衛宣力武臣特進榮祿大夫柱國廣
寧伯追封廣寧侯謚忠武劉公神道碑銘

昔我太宗文皇帝舉義靖難一時英傑智勇之臣乘運

奮興竭忠宣力共成大功若故廣寧伯劉公其一焉公
在行伍中姿貌豐偉智識過人上察知之屢有委任以
功授密雲衛百戶未半歲復以功四遷至指揮僉事庚
辰春從克蔚州攻大同大戰白溝河陞指揮同知是冬
與驍將朱榮等統邏兵哨滑口籌筭協機功最諸將辛
巳春加授都指揮僉事是後上益知公材勇可專任用
特命領兵制敵若滹沱河之奪浮橋館陶曹州之擒敗
戍卒平村之交戰永平之解圍與夫懷家庄之俘獲遼

東鐵騎前後所獲功居多再遷都指揮使內難既平上
正大統第功行賞陞中軍都督府都督僉事優賜白金
文綺永樂改元陞都督同知戊子陞右都督庚寅春扈
從大駕征北至靜虜鎮公先入賊陣敗阿魯台軍陞左
都督甲午復扈從至和林公率前鋒追奔敵酋瑪哈穆特
王沙漠為之肅清是固太宗謨烈之盛而亦公効力所
致也尋勅公鎮守遼東備倭寇至即相地形勢請於金
線島西北之望海塢築城堡立烟墩一日瞭者言東南

海島夜舉火光公計寇將至亟遣馬步軍赴塢上小堡備之翌日倭船三十餘艘泊馬雄島寇相屬登岸徑奔塢上公親督諸將伏兵堡外山下預遣一裨將領馬隊要其歸路一裨將領步隊與之逆戰公舉炮伏發寇大敗奔入櫻桃園空堡中合軍圍之自辰至酉擒戮無遺生獲百餘人斬首千餘級事聞賜璽書褒諭徵公至京面慰勞之公對曰受任禦寇分所當為此皆奉行陛下成筭及諸將士効力所致臣不敢當其功上嘉其謙抑

既而封公為奉天翊衛宣力武臣特進榮祿大夫柱國
廣寧伯食祿千二百石子孫世承襲仍遣赴鎮公疏
將士有功者陞賚有差先是倭寇出沒海上焚民居掠
財貨殺虜生口北自遼東山東南抵閩浙海濱州郡無
歲不被其害官軍猝不能制往往有坐失機罪死者至
是寇害屏息傍海千餘里兵民安生樂業以至於今受
封之明年是為永樂庚子四月辛酉薨于鎮享年六十
有一訃至上深嗟悼輟視朝三日遣官諭祭追封廣寧

侯謚忠武官為營葬賻卹甚厚復給舟車歸其喪令所
經州郡皆致祭以某年某月某日葬金口御河鄉公諱
榮世居邳州宿遷曾祖諱二公祖諱小大父諱江俱追
封廣寧伯曾祖妣余氏祖妣張氏母張氏繼母馬氏俱
贈夫人配馬氏子湍襲伯爵早卒繼室金氏封夫人子
淮早卒安繼襲伯爵側室高氏子麟陳氏子正通四人
女一人在室孫若干人嗚呼自古英傑之士逢時奮興
身躋顯榮者固多有之然求其功施國家澤被生民又

克始終保全者良鮮矣公遭際聖明茂建勲蹟荐膺封爵誠千載一時之幸也然其芳譽慶澤與國咸休亦自處有其道哉公沒之十有六年其子安乃奉武進伯朱冕所狀事行來求碑銘以昭永世予素知公者不敢辭遂掇其大者次第而銘之曰

龍飛在天六合雲從聖作物覩千載竒逢赫赫文皇靖難舉義桓桓武臣爭效才智有偉劉公既勇且雄推堅劔銳孰當其鋒宗社既安海宇寧謐惟彼敵人惡盈罪

溢屢從天討沙漠肅清維帝之謨維公之能倭醜肆害
公往鎮禦設奇殄殲茂績益著金書鍊券廣寧錫封匪
惟侈榮以勵有功海邦無警戶不夜閉維帝之威維公
之惠琅琅厥勲濯濯厥聲鼎彝有紀信史足徵益嚴益
慎保全終始生榮死哀同儕鮮比御河之鄉有封其崇
樹茲石刻垂耀無窮

故應城伯追封翼城侯孫公神道碑銘

世之瓌傑英偉之士遭遇聖明屢建勲績致有名爵老

而復能感激思奮竭忠賈勇力效勞動弘濟艱難其光
烈著于當時聲華及于後世者吾於故應城伯孫公見
之公諱巖字某世家鳳陽之於皇里曾大父某大父某
父重四三世皆務本力穡周貧卹患鄉以善人長者稱
母周氏有懿德公生元至正己卯十一月十有一日幼
時有術者異其狀謂其親曰是兒不凡宜善視之既長
性豪爽膂力絕人輕財好義為族里愛重元季兵興仗
劍歸太祖高皇帝于淮甸在軍中以驍勇聞乙未從渡

江克采石定金陵收兩浙自是南取江廣北定中原咸與有功擢金吾左衛百戶調守鳳陽已而陞武德將軍燕山中護衛正千戶洪武庚申從太宗皇帝之國于燕公誠直不欺甚見親信藩國之事多委任焉乙亥公引年致政而以子亨代己卯太宗舉義靖難以公宿將知兵特起守通州是歲南兵大至城圍數周起土山臨城攻西門燬樓堞公率衆極力捍禦城賴以完未幾兩軍合戰公操戈身先士卒大呼陷陣士氣爭奮退奔逐北

斬馘不可勝紀得饋運船三百餘艘資糧無筭以功陞
明威將軍指揮僉事仍鎮通州辛巳兵復至攻城益急
公勵將士登城力戰矢石交下敵乃退走論功陞都指
揮僉事壬午春南帥平安督遼東兵十餘萬逼城公語
將佐曰彼衆我寡若城守不出自示弱也不若及其始
至而擊之彼必敗亡乃率敢死士數百犯其鋒而城上
亦合勢大呼安衆大潰自是畏公無敢復來攻者是歲
夏六月太宗入正大位以通城屏蔽冀方使六師南進

而無北顧之憂者皆公之功於是進封奉天翊衛宣力
武臣特進榮祿大夫柱國應城伯歲食祿千石給誥券
子孫世繼自曾祖考而下勲號階爵皆如公封曾祖妣
而下悉如夫人永樂戊戌六月二十日以疾卒于正寢
享年八十訃聞太宗悼念不已命有司給棺斂治墳塋
累遣官致祭贈翼城侯謚威武歲十月葬通州東馮家
村之原配劉氏封夫人先公卒子男六曰亨曰忠曰旺
曰喜曰泰曰榮亨由都指揮僉事襲公爵女二長適武

德將軍正千戶徐亨次適昭勇將軍指揮使房斌孫男
十五人英傑敬玘貴瑀琳勉斌建禮智綱雲綸英襲父
爵早世傑今嗣為應城伯孫女十四人一適太師英國
公男忠一適金吾衛指揮桑華餘幼在室曾孫五人公
歿葬二十有二年傑奉公之事行謁予告曰傑賴先祖
餘休嗣膺封爵顧墓道之碑未立無以昭功烈垂不朽
乞不靳而畀以文庶後世子孫知先世成立之難兢慎
自持不敢廢墜厥家予昔獲侍太宗左右備悉公之勲

蹟有可書者今傑又具述公始終之詳謁請益堅誼不容辭乃敘次如右而系之辭曰

明明太祖順天應人奮自淮甸汎掃風塵公於是時仗劍來附從殄羣雄克用其武功成位升弗究厥施武德之階養銳蓄威太宗龍潛天鑒明德內難構興皇怒斯赫乃張義旗乃舉義師起公于家知公有為言言通城實國屏蔽命公鎮之邦域之計維公桓桓振我師干士勇民和戰克守完東兵之來其勢十倍薄而擊之一鼓

而潰京師既寧四方既平皇命報功顯爵是膺礪山帶
河金書鐵券子孫繩繩碩大蕃衍惟公之功惟皇之德
世其承之有永無斁馮村之原峩峩穹碑用詔後人刻
此銘詩

贈湯陰伯謚忠襄郭公神道碑銘

天眷國家誕啟中興之運必有英傑為之股肱運謀効
力於其間而後勲業克成故榮祿大夫太子太師郭公
實其人也公諱資字存性姓郭氏河南武安人曾祖諱

溫祖某父禮皆以公貴贈榮祿大夫太子太師曾祖妣
淨氏贈夫人祖妣馮氏妣王氏皆加贈一品夫人公生
而穎敏志氣超羣兒弱冠入邑庠從師受春秋有所造
就洪武辛酉入太學甲子領應天府鄉薦明年會試禮
部對策大廷賜同進士出身初為戶科庶吉士擢戶部
總部試主事丁外艱服闋實授本部湖廣清吏司主事
改陝西清吏司吏無容奸聲譽頓起陞都察院左僉都
御史無何尚書郁新以才薦之授前北平布政司左叅

議泣事之初即以本司弊政為言太祖高帝嘉其忠直
陞本司右叅政公悉心殫慮贊佐有方不數月陞左布
政使精勤詳慎紀綱大振豪猾斂跡良善獲安時太宗
皇帝在藩邸尤愛重之公有所言無不聽納及起義靖
難命公城守撫輯兵民供給糧餉百費所需未嘗乏誤
嘗以漢蕭何擬之太宗皇帝即位論功召陞戶部尚書
賜白金文綺楮幣視諸伯未閱月以北平重地命乘傳
掌布政司事未幾詔建北京設行部拜公行部尚書公

以北地軍民初安生業始遂而官司所費冗濫當搏節以恤下乃惓惓以祛弊舉廢為務或有不悅而謗公者太宗聞之降勅慰諭益以心腹任之滿考賜宴內廷頒勅獎諭錫以誥命贈公祖若考皆資政大夫北京行部尚書祖母及母皆夫人歲辛丑太宗皇帝都北京革行部調公戶部職務叢脞公勤以率下事有條序仁宗皇帝嗣位念公舊德以尚書兼太子賓客已而復念公抱疾艱於步履不忍煩以政事特陞太子太師俾致仕歸

鄉既加賜賚又令戶部給公半俸蠲其稅糧差徭特賜
璽書慰勞甚至公歸杜門教子孫讀書屏絕外累皇上
嗣登大寶眷求老成念公祇事列聖勞績居多詔起復
掌戶部事免其趨朝賜鈔二萬貫公愈感激効忠雖祁
寒盛暑必坐公署視事不暫廢僚屬胥吏莫不敬憚焉
滿考賜宴于禮部獎以勅書譬公如歲寒松柏愈老愈
勁其優待隆厚如此宣德癸丑十一月疾劇屢言蒙被
朝廷重任無以效報為愧切切訓諸子及孫當感恩思

報不及家事十二月癸丑卒上深悼惜為公罷朝遣禮部尚書胡濙賜祭勅工部製棺營喪葬贈特進光祿大夫柱國湯陰伯謚忠襄官其子佑為戶部廣東清吏司主事公生元至正辛丑十一月己巳享年七十有三卒之日家無餘貲公卿大夫皆往哭吊致奠祭配陳氏賢而勤儉累封一品夫人子男五長儀先卒次即佑又其次曰儼曰倫曰俊女二季榮高讓其婿也孫男十七人孫女十二人惟公廉介勤慎剛果有為自始仕至老視

國事如家事凡所施為毅然自任不畏強禦雖怨有弗避害有弗辭與人辯論嚴厲之氣見於詞色而推之於政略無害人蠹物之心誠國家忠謹直亮輔弼之臣也佑奉樞歸以某年某月某甲子葬某山之原乃以郎中黃璿所狀事行來請文勒之墓道以垂永久余與公文好三十餘年不可以辭既序其槩而復系以詩曰

川嶽降靈篤生賢哲乘時奮庸以樹勲烈惟公之生早負俊才列職郎署超僉憲臺風猷宏振綱紀斯秩出叅

大藩政興弊息凡所設施筭無遺策顯命存臨特拜方伯赫赫太宗仗義而興命公居守撫民餉兵既正大位嘉公勞績進位尚書厚其賚錫公愈飭勵經國如家諤怨弗恤恩寵屢加仁宗嗣位眷顧尤重兼秩宮僚式隆任用念公抱疾進位師臣俾休于家疊施以恩皇上繼統眷公者舊詔復任事寵待加厚維公忠實衆所共知維公勲業顯著于時筋力雖衰寸心猶赤奄忽長逝帝用悼惜贈爵賜諡喪葬是營官其後嗣存歿光榮維茲

光榮從古罕致公具有之其誰克似武平有山藹藹其
崇勒文墓道垂耀無窮

故資善大夫太子少保禮部尚書兼武英殿大
學士贈祭祿大夫少保謚文靖金公神道碑
銘

國家當太平熙洽之時必有忠謹淳實之臣論思獻納
於其間而後克臻乎至治之盛故資善大夫太子少保
禮部尚書兼武英殿大學士金公實其人焉公諱善字

幼孜世居臨江新淦之厚聚宋時有諱清者遷洪坑至十五祖諱某者復自洪坑徙培山遂家焉曾祖德明祖仲卿皆以儒傳家父諱守正學問該博洪武初辟為郡學訓導嚴毅剛方人稱為雪崖先生公生而秀拔不羣幼克勵志於學雪崖竒而教之及長遣從前進士聶鉉受春秋業成為邑庠生領鄉薦登洪武庚辰進士第擢戶科給事中太宗皇帝即位首以文學薦入翰林改檢討命與解公縉胡公廣黃公淮胡公儼楊公士竒與蔡

凡七人同直內閣叅掌機密不數月皆陞職公為侍講
階承直郎明年蒙賜象笏幘頭公服尋賜二品織金衣
寵任甚專仁宗皇帝在春宮侍臣進講經史公獨說春
秋詞嚴而理正遂承命作春秋要旨既進深協睿衷公
嘗病遣中官偕御醫往視及痊入朝慰勞甚至丁亥陞
右春坊右諭德乃兼侍講階奉訓大夫今上皇帝為皇
長孫命宮僚兼職輔導賜勅獎諭公亦與焉己丑扈從
來北京庚寅從征出塞冬還南京辛卯詔重脩太祖高

皇帝實錄公與纂脩壬辰命典文衡考試天下貢士號稱得人既而余五人者蒙賜誥命公得推恩贈其父如公職封母羅氏為太宜人贈妻孔氏為宜人癸巳復扈從來北京甲午從征西虜既還命儒臣纂脩五經四書及性理大全書學士胡公與公及余實總其事書成重沐恩賚丙申陞翰林學士仍兼諭德階奉議大夫是冬還南京明年復護駕來北京戊戌實錄上進錫宴于禮部有金織紗衣鈔幣之賜庚子陞文淵閣大學士仍兼

翰林學士壬寅扈從北征軍行乏食偵知賊營尚遠公
與余密疏軍中利病言之遂詔頒師癸卯隨駕巡邊獲
其名王額森圖罕以歸特蒙厚賚甲辰復從北征師還
駐榆木川太宗晏駕凡沐浴含斂及道路措置之儀公
與余實與焉仁宗皇帝嗣位深加寵眷進戶部右侍郎
仍兼前二職今上正位東宮拜資善大夫太子少保兼
武英殿大學士禮遇益厚凡法司論決重刑必命楊公
與余及公同審錄其中伸雪蓋多時賜大臣五人銀圖

書其文曰繩愆糾繆以為政務或有闕失許用此密疏以聞公亦與焉當時榮之是冬奉命持節冊趙王妃及封梁王明年洪熙改元命兼禮部尚書三俸俱支賜誥命贈公父祖皆太子少保武英殿大學士祖妣為夫人加封母太夫人贈故妻劉封繼室屠皆夫人明年春公以母老首奏歸省仁宗可之命給驛以往賜賚甚厚皇上嗣位公丁內艱特詔起復命為總裁官纂修兩朝實錄己酉命持節往寧夏冊封安化真寧二王妃所過閱

兵民休戚還奏上嘉納之庚戌兩朝實錄成賜鞍馬白金文綺金織襲衣錫宴于中府是冬扈從巡邊至宣府而還明年秋疾作上命醫診視賜藥物至冬疾劇少傅楊公與余往候問公言死無足惜但愧無以報朝廷益生民家人有請祈恩於子者公曰此君子所耻言及再有問竟不答卒之日實宣德辛亥十二月丁未也享年六十有四訃聞上為之嗟悼贈榮祿大夫少保謚文靖命有司製棺遣禮部尚書胡濙祭之給舟車歸其喪為


造墳塋恩至厚矣其子昭伯將以某年某日葬公于某里某山之原而以碑銘為請余與公同年同官處禁林三十餘年出則聯鑣入則同席雖親兄弟不過是也自公之歿痛傷于懷弗能自釋銘奚可辭惟公孝友謙恭沉實和易樂善汎愛出乎天性其學問淹貫文章豐暢為人所愛重凡三扈從往來兩京五從北征沙漠執筆從事於行陣之間乘危涉險未嘗以勞動為言其在朝廷動作進止皆有常度論思獻納多所裨益是以歷事

累朝荐膺寵任眷遇雖隆而自處益謙名其燕休之所
曰退菴可謂得大臣之體矣是宜樹碑墓道以垂不朽

銘曰

天啓皇明文運昭宣輔贊至理必多俊賢顯顯金氏世
業以儒善積有源慶澤乃敷惟公之生天資挺秀羣經
子史靡不博究既擢巍科給事廷陞太宗右文寵渥荐
至擢寘禁林從容宥密克副淵衷屢進華秩于狩于征
公罔不從恪勤夙夜不有其躬仁宗嗣位簡賢任舊爵

位日崇寵眷彌厚



文敏集卷十七

欽定四庫全書

集部

文敏集卷十八

詳校官編修臣裴謙

中書臣劉源溥覆勘

總校官中書臣朱鈐

校對官學正臣常循

膳錄舉人臣徐汝宸

膳錄監生臣舒免岐

欽定四庫全書

文敏集卷十八

明 楊榮 撰

神道碑銘

故資善大夫兵部尚書兼太子賓客張公神道

碑銘

宣德辛亥正月癸酉兵部尚書張公以疾卒于北京之
官舍訃聞上為之嗟悼遣中官即其家賜賻鈔三萬緡
親為文命禮部胡濙祭之勅工部治墳塋戶部復其家

是歲某月某日其孤璘奉柩葬所居東阿之王村祔於先塋之次乃奉通政徐琦所述公行狀詣予泣拜請銘將以刻石于墓道予弗獲辭按狀公諱本字致中姓張氏其先世居琅琊自其高祖景瞻徙居東阿今為東阿人曾祖欽祖誠父從善皆隱德弗仕至是以公貴祖父皆得推恩贈資善大夫兵部尚書祖母李氏母丘氏皆贈夫人公自少穎敏好學洪武中自邑庠生以明經貢禮部補太學生其才識超邁長於應變始仕為江都令

卓卓有治聲百姓愛之太宗皇帝靖難兵次揚州率耆老詣軍門謁見遂陞揚州府知府繼陞江西叅政其在職備悉民艱不憚繁勞夙夜孜孜以祛除積弊剷剔奸蠹為務民甚安之未幾召為工部左侍郎以事謫交趾雖間關萬里觸犯瘴癘處之怡然未嘗有戚戚之色方是時仁宗皇帝居儲副素知公名奏召還以為刑部右侍郎其治獄平恕而於奸慝必窮覈弗少貸然皆出于至公輿論歸焉洪熙改元之初進秩兵部尚書兼掌都

察院事無何召至北京留行在兵部今上皇帝嗣位以公克任大事益見親信凡軍政之闕失廢墜者力舉行之井然皆有條緒於是蒙恩降勅褒獎命兼太子賓客有白金文綺鞍馬之賜且以戶部政務隳圯命公兼領之既蒞事銳然以為己任除弊建利經慮百方必至當而後行而遽至大故惜哉享年六十有五卒之日公卿大夫奔走相吊者騶呼相屬於路配王氏封夫人子男二人璘環女二人盧春祁慶其婿也孫男三繼祖繼宗

如意保公賦性剛直居官廉介凡事以身任之是是非
非不為苟且不事阿徇其論議侃侃有古大臣之風是
宜為銘蓋昭公之遺德於弗朽且以示其後之人焉銘

曰

猗歟張公易直而通始宰江都乘時奮庸繼叅藩政旬
宣是職入佐司空在位正直南交召還式副憲部體上
欽恤用法平恕既任司馬兼掌地官兵政聿脩國賦用
完凡厥猷為竭心殫慮羣言或殊公毅弗顧從容廟堂

正笏垂紳執德秉義如古大臣天胡弗仁奪公何速吊者雲赴巷悲路哭賜賻暨祭治其墓墳仍復其家澤施子孫東阿之原鬱鬱窳窳公藏在此過者必式

故資善大夫兵部尚書許公神道碑銘

汴之許州即古之潁川郡其士風端慤尚志節由是出者莫不著名於世若今之大司馬許公其一焉公諱廓字文超姓許氏世居許之襄城曾大父居敬大父守誠父忠信皆隱德弗仕母王氏公生而岐嶷賦性醇厚齟

黜之年即知務學其父遣入邑庠受經遂領洪武己卯
河南鄉薦明年試禮部弗偶入太學永樂丙戌擢錦衣
衛經歷未幾超授工科給事中復陞鴻臚寺左寺丞皆
能舉其職歲壬辰拜工部右侍郎時職務叢脞公悉心
殫慮以佐其長凡可惠工而利國者皆奏行之事多就
緒輿論歸焉甲午太宗皇帝親率將士往征北敵命公
督運糧餉隨軍往返六閱月而士馬給足人無暴擾乙
未將營建北京命公提督神木廠事工繁而役重公益

持謹慎始終弗渝己亥以交阯人戶田賦未有定規命
公往理之公至察人心事宜與總戎豐城侯李彬掌交
阯布政司事尚書黃福等議其可否遂還朝條奏其利
害數事上皆嘉納之仁宗皇帝即位念公勤勞中外政
績有稱遷工部左侍郎授正議大夫資治尹賜誥命推
恩贈其父祖皆如公官祖妣閻氏母王氏皆為淑人皇
上嗣位知公惇實可任益隆眷待宣德庚戌秋河南民
饑流離者衆上以公大臣素為鄉邦所重命往撫輯之

至則旌廉黜貪勸善懲惡梟示有司弗得復有科擾其
豪右母索取私錢凡夫匠雜役及諸採辦與積逋稅糧
諸物悉奏免焉於是民皆趨走復業戴公若父母還朝
上慰勞甚至辛亥春正月降勅獎諭陞公為行在兵部
尚書復賜誥命授資善大夫并加贈厥祖若父皆尚書
祖妣及母皆夫人公荷國厚恩方夙夜經慮以圖報而
遽以疾聞皇上賜藥命醫視療竟不能起實宣德壬子
六月十二日距生洪武丁巳三月辛巳得年五十有六

訃聞上深悼惜遣官賜祭命有司治墳塋給舟車歸其喪公卿大夫皆走哭吊致奠祭馬配王氏封夫人子男四長曰麟獸早卒王氏出也次繼廣繼文繼武側室張氏陳氏劉氏出也女三長適盛全次適蔚善次適建平伯高遠亦皆王氏出也卜以某年某月某日葬公于其鄉首山之陽其宗姪國子生昌率其幼子奉監察御史羅亨信所狀事行詣予請銘予昔與公有同官之好弗可辭惟公安貌豐偉襟度夷曠具寬厚之德有通敏之

才歷事三聖荐沐寵恩詳慎績密不驕不矜凡受委任
靡不竭盡心力是以官無廢事民庶樂康蓋卓然有大
臣之風是以樹碑墓道以垂不朽予既為次序之而復
系以詩曰

猗歟許公中土之英少克務學遭世太平發跡戎幕尋
陟機要復陞鴻臚益臻榮耀貳卿之任佐理式勤益國
利民譽日以振督運糧餉從征殘虜將士給足歡聲載
路于彼南交版賦未清具陳可否深協聖情仁皇嗣位

益隆眷顧錫命推恩光昭宗祖聖皇繼統篤任弗渝命
撫河南民用昭蘇迨進司馬璽書獎諭機務孔繁實深
倚注惟公砥礪理國如家經慮多方茂著才華尚未耄
期遽爾遐棄帝用嗟悼賜葬及祭恩命載臨哀榮始終
勒石墓道垂耀無窮

故資善大夫都察院右都御史熊公神道碑銘
國朝統一天下稽古為治既命六卿分掌庶務復設臺
憲之臣以振風紀法制精密茂以加矣然居是職者非

才識通敏廉正詳慎不足以當之若都察院右都御史
熊公始克當其任焉公諱槩字元節自幼聰慧務學其
父授以春秋業大進領永樂戊子鄉薦辛卯會試登進
士第擢監察御史容貌豐偉仁宗在東宮時器愛之命
署刑部事未幾被薦拜廣西按察使調廣東俱著能聲
今皇帝嗣位召拜大理卿命治水于蘇松經畫得宜民
不知勞而水患息所至輒勸率郡縣脩葺學舍督勵師
生講習新胡安定范文正魏了翁三陸祠復文正了翁

義田墾地禮諸賢之後聲譽赫然時吳浙諸郡軍民有豪橫者繼承命撫視威風凜凜察其素為民蠹者數十人械至京師寘于法扶植寡弱俱令得所於是奸頑斂迹閭里獲安間有誣訴公贓弊者上不之聽益隆信任特降勅獎勵有潔已奉公為國為民之語迨還特陞今職命莅南京公益勤慎務辨誣理枉既而母歿哀毀過情奉命歸葬即起復視事宣德癸丑北京都御史顧公感疾上命驛召公來任其事至則一循舊規用法益平恕

凡有所陳上皆容納是以憲紀肅然上嘗幸近郊命侯伯都督尚書同公居守益克小心祇慎今年秋車駕巡邊復令居守兼掌刑部事以勞感疾逾數日上還朝公猶勉強進見退而疾劇語家人曰吾其殆乎越六日上賜諸大臣鹿腊及內醞公獨拜受於家曰臣愧無以為報明日遂不起實宣德九年冬十月十一日也訃聞上命官賜祭給舟歸其喪為造墳塋其孤端將奉公柩歸葬于吉之山乃以左春坊左庶子兼翰林侍讀周君崇

述所狀公行詣予徵文勒石墓道予辭不獲按狀公先
世居南昌之豐城祖達夫仕元福州錄事卒于官父敬
芳幼弱隨其母依吉水胡氏因冒其姓遂占籍吉水敬
芳既長自邑庠升為國子生有學行迨公貴始復舊姓
蒙賜誥進階資善大夫得以推恩贈祖考皆如公職祖
母楊氏贈夫人母郭氏封太夫人配劉氏繼璩氏皆封
夫人子男五煜壬子貢士焯安端盛女五長適王德賢
餘在室孫男二曰文曰昌女一曰癸貞昆仲四人甚相

敬愛嘗作雍睦堂以敦友于之情詞林諸公咸美之以
詩公能詩文所著有芝山藁公餘藁藏于家尤善草書
凡求者輒書與之不吝其為人大率類此嗚呼公賦性
淳實內剛而外和居家則孝友篤至莅官則寬猛適宜
及總憲紀益存寬厚不事苛刻至於論議施設待人接
物綽有大臣之體是宜勒碑神道以昭後世銘曰

猗歟熊氏肇邇南昌繼遷吉水家聲益張維公之生天
資挺秀夙擢魏科才華實茂一服豸冠克振憲風用法

惟平式協宸衷出掌藩臬益勤益慎召拜大理聲譽益
振蘇松之郡洪水湯湯命公拯之夙夜不遑䟽捍得宜
水患用息民庶載忻利我稼穡吳浙阜殷豪猾肆強既
除既治閭閻獲康有譎其徒誣公贓弊惟上聖明委任
不替降勅獎諭玉音諄諄特召回朝益隆益恩命總憲
臺綱紀秩秩南北二京並樹勲績公尚未老遽爾云亡
帝用嗟悼復錫寵光命官賜祭為營葬事恩榮始終人
罕能儼新阡轟轟神道有碑刻茲銘詩千載永垂

故榮祿大夫少師兼吏部尚書贈特進光祿大

夫太師諡忠定塞公神道碑銘

天眷我皇明誕啟文明之運必篤生彌綸叅贊之臣相
與協恭和衷用臻於至治揆之西蜀塞公槩見之矣公
世家重慶之巴邑曾祖繼祖祖均壽考源斌以公貴累
贈封至榮祿大夫少師兼吏部尚書曾祖妣牟祖妣雍
妣胡繼羅俱一品夫人公生而穎異首骨隆起風鑑者
咸稱為國器及就學日記數百言郡守貳奇之選補郡

庠生學業大進尋領鄉舉登洪武乙丑進士第授中書舍人初名瑤字宜之聞繼母喪請守制太祖高皇帝因問曰得非蹇叔之後乎公叩首不敢對帝嘉其篤實因更名曰義御書義字賜之建文時擢吏部右侍郎太宗文皇帝入正大統轉左侍郎尋陞尚書永樂甲申兼詹事府詹事戊子命兼輔皇太孫己丑大駕巡幸北京留輔皇太子監國適秩滿九載賜璽書宴勞之公為宮僚長皇太子禮遇尤厚少有疾輒遣人慰問嘗以公所居

頗隘特命有司增建廳事每遇節日必賜宴飲賦詩寵異之己亥聞父喪上及皇太子皆遣祭復賜教寬慰賻以白金襄事畢即命起復辛丑皇太子赴北京留公輔導皇太孫尋侍從至北京奉命巡撫畿內明年還京甲辰秋仁宗昭皇帝踐祚陞榮祿大夫少保兼吏部尚書食二俸踰月陞少傅兼官如故賜冠服象笏玉帶尋陞少師嘗賜繩愆糾繆銀章俾其有所匡正則封進之復賜銀印一文曰蹇忠貞印并璽書備言公忠勤之實以

示褒崇宣宗皇帝嗣統命監脩兩朝實錄宣德紀元扈
駕征武定州賜人口寶帶金銀文綺丁未扈從巡邊還
上以公春秋既高且師保職惟寅亮詔輟公吏部之務
庚戌春兩朝實錄成賜鞍馬白金文綺時先朝舊臣惟
公為首上深眷顧之嘗賜銀圖書文曰忠厚寬弘賜甲
第于文明門之西北落成之日復賜宴器鈔幣凡節日
遣中官宴賜于家秩滿賜宴禮部降詔褒諭及公誕辰
賜廩馬鈔幣今皇帝即位賜賚特厚公舊有心疾至是

復作上屢遣中官及太醫院名醫往視之復賜羊酒及鈔以慰勉之明日疾劇公泣謂太監范安曰義起自布衣荷列聖擢用無所補報今皇帝新承大統又不獲效忠沒有遺恨第自今願率由太祖皇帝舊章庶幾天下生民受福復諭諸子孫和順孝敬恪遵法度遂卒實乙卯正月丁亥也訃聞上為悼念命有司治喪葬贈特進光祿大夫太師尚書如舊諡忠定官其長子英尚寶司丞屬以國有大事停祭百日後命禮部尚書胡濙諭祭

之給舟車歸其喪公生元至正癸卯十二月乙卯至是
享年七十有三配劉氏加贈至一品夫人繼張氏封一
品夫人側室孔氏子男四長即英次芳芸荃女二適馬
俊李誠英芳二女皆劉出芸孔出荃張出洪熙時授尚
寶司丞早卒孫男四霖震霑露孫女一英奉樞將以某
年某月某日祔葬鄉之先塋乃列附三代并公歷履之
詳徵予銘其墓道之碑惟公稟含弘和厚之資出當重
熙累洽之運迨事列聖荐膺重託獻納匡翼功在國家

天錫之壽褒然為時元老蓋蜀之山川清淑之氣鍾之
哲人者自尹吉甫佐周宣致中興之盛曠世鮮有其儔
若公之遭際事業聞望足以繼休聲於千載之下於乎
盛哉予與公相知既久故於英之請不辭謹撫其概俾
勒之石用垂不朽銘曰

天眷國家篤生才賢光輔至治夫豈偶然維公之生實
鍾間氣時焉斯出遭遇盛世起自魏科寓跡鳳池擢貳
天官銓衡攸司紀元永樂為天官卿繼兼官僚荐荷寵

榮洪熙更化倚注尤厚進秩三孤厥績斯茂迨及宣德
寵優舊臣不煩以政左右日親嘉謀嘉猷夙夕入告務
底裨益孰曰言耄玉帶廐馬白金綵幣寵賚自天惟德
之惠祇承聖皇嗣位之初惟恪惟勤一致是圖惟公在
廷五十餘年恩榮始終孰與比肩蜀山蒼蒼川流洋洋
公所存者山川之光

故榮祿大夫太子太保兼禮部尚書呂公神道

碑銘

國家當文明熙洽之運海內乂安四方無事則必有英
偉魁傑之臣協心輔治以底垂拱無為之化誠非偶然
也故榮祿大夫太子太保兼禮部尚書呂公蓋其人焉
公諱震字克聲陝西臨潼人曾祖仲良祖敬甫父子節
以公貴推恩贈官皆如公之秩曾祖妣蔚氏祖妣張氏
皆贈夫人妣盍氏封太夫人公生至正乙巳某月某日
自幼穎悟日誦萬言輒記憶終身不忘里中稱為神童
年十五選補縣學生二十以明經領鄉薦入太學益以

聰敏聞方是時朝廷欲稽郡邑壤地之廣狹貢賦之多寡命有司具圖以進使賦役適均姦孽無隱公承檄往兩浙督之民不勞而事集既還京師遂拜山西按察司僉事繼入為戶部主事尋復出為北平按察司僉事所歷皆有治聲太宗文皇帝在潛邸將舉兵靖難公知天命有在夙夜匪懈竭效勞動內難既平召為大理少卿尋陞大理卿遂拜刑部尚書皆克盡厥職繼遷禮部垂二十年凡禮樂制度郊廟祠祭燕享錫賚朝覲會同之

事莫不參酌古今以時舉行時論稱之太夫人家居年
耄每形於憂念於是得承命歸省者三皆有白金文綺
之賜朝野榮之公之歸也凡兩值關中飢即命所司出
粟以賑之暨還條列以聞上是之人咸以為得大臣體
仁宗皇帝即位優遇隆渥恩禮有加嘗從容上言百司
庶政具有成法第悉遵祖訓行之勿有所更則永世有
賴仁宗嘉其誠懇降勅褒勉賜以綵幣鈔錠初命掌太
常卿事未幾加太子少師尋復進太子太保仍兼禮部

尚書配夫人謝氏卒朝廷遣祭給葬儀物并賜鈔米既而奉旨祀古皇帝王陵寢于闕西復加厚賜俾訖事便道祀先省母恩榮之盛振古罕倫比還值今天子登極念公舊勞愈益寵信凡冊立拜封及宴勞之事一任於公而不疑可謂得行其所志矣公為人沉實寡言笑善善惡惡無所阿徇是是非非不為苟容凡有聞見莫不指陳於上以明其曲直人惟德之而無怨焉尤善薦士士之由公出者率為顯官蓋其孝弟著於鄉閭信義厚

於朋友天性也宣德元年四月三日以疾卒享年六十
有二上惻然悼念賜以棺槨楮幣遣官諭祭復勅有司
護送其喪以歸為營葬焉子男五熊禎燾杰然熊為兵
科給事中女三人薊州衛指揮劉源戶部主事張鶴橫
海衛指揮王貴其壻也孫男二人數敷熊奉樞將行迺
以今禮部尚書毘陵胡公源潔所述公之行來謁予泣
拜請銘惟公以穎敏之資宏博之器歷官累朝荐躋顯
融聲光振于當代事業垂於來葉榮名厚祿克保令終

誠可謂盛世之賢輔矣自非負英偉魁傑之材曷克際
茲寵遇哉是宜為之銘銘曰

公在亂髻既悟而聰闕右視公如古神童年甫弱冠蜚
聲場屋遨遊辟雍學成行篤始僉外臺三晉是依入掌
國賦出納允釐佐憲北平克振風軌赫赫太宗龍潛于
邨公受知遇眷顧實隆迨于龍飛偉矣其逢既職士師
遂陞司寇再遷春官恩寵彌厚仁廟繼統篤念舊臣進
秩師保益信而親恩命維新被及先代榮歸其鄉獨擅

風裁今上嗣位謨協宸衷知無不言眷待維豐謂公顯
融宜膺盛福二豎見侵竟以弗祿乘化歸盡捐世若遺
公復何憾遐邇是思返葬家山妥靈窀穸銘以昭之永
世無斃

故資政大夫都察院右都御史王公神道碑銘
國朝稽古為治用人之法惟舊是圖列聖相承率由茲
道於是耆德宿望之臣敷歷中外荐躋顯要以至持衡
秉鈞先後數十年榮名始終者往往有其人焉何其盛

也乃宣德二年夏四月朔日都察院右都御史王公以疾卒明日上賜之棺且命禮部遣官祭之兵部給舟車歸其喪有司為治墳塋越月其孤瑾奉監察御史羅汝敬所述公之行狀詣予泣拜請曰先公既歿將祔葬鄭之城西南先塋之次然無文刻于墓石恐遺德弗傳敢請一言以示于後庶幾永有賴焉予與公同官于朝交久且厚誼弗可辭按狀公諱彰字文昭其先世家太原代有顯人其後散居四方皆為鉅族公之高祖諱資元

至元中以明經為河南鹿邑學官因家焉曾祖良祖賜
父汝能皆樂善好義居鄉有聞母郭氏元季汝能挈家
避兵汾晉之間海內既平將歸其鄉過鄭樂其風土遂
占籍焉公生元至正丙午九月十八日幼穎悟好學稍
長有司選為州學生益自刻苦學日進洪武丁卯領河
南鄉薦明年會試禮部弗利補太學生嘗使山東平糶
以實軍儲同列納賄縱逋負者公毅然責之弗聽比還
其人果得罪公遂以廉幹聞明年擢吏科給事中典封

駁之任夙夜在公出納惟允歷左右給事中益慎益度
聲譽尤著遂進都給事中未幾陞刑部福建司員外郎
時有豪橫往往構訟根株連結至數歲不能斷決有司
率為所誣害公曰法貴平恕然亦豈宜寬縱以長惡哉
於是正之以法而為所誣者皆得釋人咸悅服既而擢
山西布政使司左叅政居藩七年吏弗忍欺民懷其惠
永樂初召拜禮部右侍郎階嘉議大夫時四方萬國奉
玉帛重九譯以朝覲賓貢者肩背相望于京師賞賚燕

享無虛日公與尚書鄭公賜同德協恭奉職惟謹明年
以父喪去官哀毀踰節鄉鄰稱焉服除遷戶部嘗祀華
岳過陝州之新安聞民鬻男女償逋租既還奏之詔悉
蠲其租且官給楮幣以贖其所鬻之男女人皆德之永
樂壬辰改都察院右副都御史論事嚴毅持法公正人
不敢干以私嘗以母夫人年高欲歸省侍而難於請適
蒙恩命按河南許其過家且賜母夫人冠服仍給白金
楮幣以歸為壽時人莫不歆羨歲庚子陞右都御史秩

資善大夫仍按河南待諸鄉舊一如平生至於公法雖親不貸時諸郡連歲水惠民多流亡而有司復加重斂民益以困公悉奏之於是詔停不急之徵十餘事凡官吏以貪暴罷免者九百餘人招流民復業者幾五萬家發官廩以賑之賴全活者甚衆先是強賊張大聚亡命差我山行劫商賈為之不通女僧宋繼善與其徒數百人為妖言撼衆奸人李人美以左道惑人公悉捕斬之平生嫉惡甚然獄有所疑者必反覆訊鞫然後決有鄭

旺者罪當辟公閱其辭疑焉命御史為辯之果得不死
公性至孝以父早世事母夫人尤謹在京師所得四方
珍味必遣人馳獻然後敢食歲時薦先竟日悲哀不樂
所得俸祿必分族人及濟貧乏嚴於家法訓飭子弟其
有違禮度者必痛責之俟其悔悟乃已洪熙改元進資
政大夫得推恩封贈其祖考皆如公官母封太夫人咸
以為榮公卒之日士論嗟惜之配郝氏有賢行封夫人
子男二長即瑾次瑜先卒女四長適太原衛指揮孔勝

次適楊祥次適李遠幼許嫁鄒敏公為人簡靜待人以誠率下以正平居言若不出口至臨事論辨詞氣侃侃弗少置自為侍從之職荐躋顯要歷事累朝廉介自將恪勤夙夜垂四十年毅然有古大臣之風若公者庶幾無愧於其職也歟遂為序次其平生行能之槩而系之以銘其辭曰

王出太原世有聞人繼遷鹿邑闕闕嶙峋迨于高曾家聲益振元季兵興避地汾晉幸際聖明桑梓是思爰樂

鄭鄉占籍于茲公承厥後早悟而通發迹塲屋遊歌辟
雍列職內庭實典封駁優游禁近荐膺顯擢既遷秋官
持法惟平出佐山西藩方實寧公來自藩乃貳宗伯繼
贊司徒厥聲籍籍秉憲內臺風軌肅清白髮蒼顏翼然
在廷弗規弗隨正色率下從容廟堂贊輔聖化惟公克
忠廉謹自持惟公克孝祇奉母慈荐沐國恩膺此褒典
光于三世無間幽顯公宜壽考寵眷是承云胡逝矣溘
爾遺榮公則無憾世乃嗟惜邦失重臣人懷舊德蒼山

我我為公之墳百世之下尚徵斯文

故資政大夫刑部尚書趙公神道碑銘

天之生才將以資於世用然必國家有以教養之於未
用之先歷試之於方用之際及其練達既久而後大用
之以盡其才故能建功立業進退協道足以震今而耀
後焉若故資政大夫刑部尚書河南趙公蓋其人也公
諱珣字雲翰其先為邢臺鮮于社人元季擾攘公之父
携家避兵於平陽夏縣而公始生時寇出四掠公在襁

祿母嘗抱匿林莽間迫於虎置公于地虎熟視而去聞者異焉世靖將歸邢臺道經于汴閱其風土而樂之因家于汴遂為汴人公自幼穎敏嗜學進退動止屹如老成既長游學郡庠已卓然于儕輩中洪武丁卯由鄉薦補太學生嘗被命董事山東以克廉謹受襲衣楮幣之賜歲庚午授兵部職方主事命覈天下兵馬暨諸路屯戍補其缺而增所宜置公得其實且圖以進太祖皇帝以為能乙亥陞武庫員外郎慎密小心尤為當道者所

重戊寅陞浙江右叅政刺繁治劇事無凝滯時海寇出沒劫取人財公以計捕之境內獲安尋丁外艱吏民慕之如離父母太宗皇帝嗣臨大寶以公能專對命使南交至則誕宣德音恩威兼布夷長歎服既歸卻其金寶之餽太宗聞而嘉之錫賚優渥擢刑部右侍郎未幾轉工部再轉禮部受命往封西寧侯宋晟歸拜禮部尚書賜宴于華蓋殿并徹御筵饌羞遺其母以榮之戊子仁孝皇后崩逝勅公詣北京卜山陵告成膺楮幣之賜壬

辰督創隆慶保安永寧諸郡治撫輯有方而新集之民
悉安其業而不知勞丁酉改兵部尚書明年以內艱去
已而起復專理塞外兵政疾作太宗遣中官偕名醫往
視疾已入謝復令調攝于家既康復命詣塞北訪牧地
遂具順川等處以聞於是出廐馬牧之孳畜蕃息壬寅
大駕北征命公督軍餉措置有方兵食充給仁宗皇帝
嗣位改刑部尚書居職六年式敬由獄宣德庚戌力以
疾辭宣宗皇帝矜其賢勞特賜致仕既歸汴構一室於

東郊名曰石泉茅屋日與親友為歡以樂暮年正統丙辰七月十有五日以疾卒于正寢享年七十有二訃聞上遣官諭祭仍命有司塋葬公生乙巳某月某日曾祖諱某有隱德祖諱和之父諱得以公貴俱贈資政大夫刑部尚書祖母張氏母侯氏俱贈夫人配胡氏封夫人子男四長曰愚舉賢良方正授路州襄垣縣丞娶段氏次曰魯娶劉氏又其次曰鈍曰朴俱先公卒女二人長蕙卿適刑科給事中王鐸之子礪次孫卿適兵部尚書李

慶之子震孫男五人瑄琰玆琮珍孫女五人以是歲八月二十有三日葬公于祥符南百畝岡之原愚奉都御史顧公佐所述狀來京謁予泣拜請銘惟公儀度英偉倜儻多才善屬文喜歌詠有愴父集二卷藏于家嗚呼士君子出處進退求合乎道而已觀公之仕于朝也據誠效勞知無不言每有獻納多契上意雅性節儉雖貴列六卿而自奉澹泊及退居也幅巾藜杖蕭散自如不以外物經心公之進退協于道者如此是宜有銘銘曰

於皇太祖建學育才士習丕變人文聿開疑疑趙公遭
值明世肄業泮宮用成大器學優而博識敏而明列職
内外式殫厥誠明明太宗惇信崇德擢任亞卿旋拜宗
伯直清寅畏夙夜惟勤和厥上下治茲神人乃遷司馬
克詰戎政兵食之充畜牧之盛伊誰致之實公之為中
外咸曰任公其宜邦禁之司仁廟之命昭哉五刑惟恤
惟敬國有六卿公歷其三僚屬具瞻泰山巖巖公仕四
朝終始一節既老而休允矣明哲維公之賢生榮死安

作此銘詩以永後觀

故驃騎將軍左軍都督府都督僉事許公神道

碑銘

惟勲舊重臣任連率之職克以清慎自持公勤事國寬
厚御下榮名壽考底于令終者吾於驃騎將軍左軍都
督僉事許公見焉公諱亨字士通世家鳳陽定遠父得
從太祖高皇帝起淮甸以功累遷都指揮僉事洪武丙
子公以父蔭為燕山右護衛指揮僉事己卯調開平備

禦已而還京調廣武太宗文皇帝舉義靖難兵至維揚
公即來見上嘉勞之遂拜都指揮僉事賜之綵幣鞍馬
命守和州未幾俾莅北平都司事撫馭有方士民安之
歲庚寅受命董治長陵經畫措置得宜人樂趣事而忘
其勞上嘉其能進都指揮同知是冬調掌金吾右衛事
尋仍董前後先後凡八年勞績為多丁酉進都指揮使
出鎮浙江浙東南巨鎮海寇時或竊發公至擇人守屯
堡時訓練寇遂屏迹居民以寧歲調兵士漕運給京師

分番更代具立成規私不容髮以是勞逸均而餽餉及
期至於繕治城郭堅利甲兵戒飭軍士毋為民擾尤悉
其心故兵民相安而市井晏如也今上皇帝嗣位以公
歷事累朝克效忠勤特遣使賜以勅書白金文綺拜左
軍都督僉事仍掌浙江都司事公益感上恩務殫厥職
比累陳年老乞致仕上以公耆舊且精力未衰不俞所
請正統戊午六月二十有九日以疾卒於官享年七十
有四訃聞上悼惜不已遣官諭祭仍勅有司治塋事今

年公長子壽來京奉狀謁予請銘其墓道之碑余聞公鎮浙二十餘年視事率以味爽雖隆寒盛暑無間指命羣下言簡而要其能者稱獎之不置違令者罰不少貸性節儉出入布袍革帶從者數人量入為出未嘗妄費長幼衣食必均一男女婚嫁必及時臧獲過十歲者必令異處子孫有過者必杖之雖素親厚者亦不敢為之丐免家庭之內肅如也退居常閉戶端坐終日不聞警歛之聲晚暮養生之術侍妾悉遣令他適故平生所為

尤為卿士大夫所推獎先娶殷氏繼駱氏子男六人壽
殷氏出也今襲杭州右衛指揮使霖復富駱氏出也貴
出於側室張氏端出於陳氏女三人盧清張成蔡勝其
壻也孫男三人曰永安曰俊曰佛聚嗚呼世之武弁之
裔席祖父之蔭享有祿位者固多矣而能懋樹勞績躬
躋顯庸以光厥先以大厥後率履不違終始無愧若公
者豈可多得哉是宜銘于墓道之碑俾觀者有所考見
銘曰

昔在太祖龍興泗濱豪傑景從智力畢陳維時與勞公
之先臣肆有顯爵以遺後人孰當其慶曰維公賢公其
承之總戎于燕皇皇太宗龍潛于淵爰靖內難公時別
遷義旗一麾天應人歸謁見維揚公不後時帝曰舊臣
是用不遺公既見用腹心攸期清勤忠慎誓委厥躬帝
命式嘉顯爵日崇出鎮浙藩德望益隆士悅民安維公
之功公事五朝眷寵有加玉帶錦袍身章以華咸曰老
成福壽未涯茲既逝矣疇不悼嗟赫赫偉績祖考之光

悠悠慶澤嗣續之昌公具有之雖亡弗亡刻此銘詩以
永厥揚

故驃騎將軍左軍都督府都督僉事衛公神道

碑銘

自昔帝王之興必有奇偉瓌傑之士感會風雲應期而
起相與奮勇効謀摧鋒破敵以共濟大業及其成也躋
崇階享厚祿安富尊榮既有于躬而豐功茂績又足以
炳耀後世垂諸無窮者夫豈偶然哉蓋天生明主將以

開一代之業非有熊羆勇敢者為之股肱心膂則不能以自成光武中興漢室而有二十八將之輔唐太宗撥亂反正而有英衛輩之功君臣相遇天寶定之豈人之所能為哉身若我朝太宗文皇帝當奉天靖難之初而故驃騎將軍左軍都督府都督僉事衛公與有勞績視漢唐諸將蓋不多讓公諱青字明德世為松江華亭人曾大父貴大父某俱不仕父諱文武有勇略元季兵興隸戎籍暨歸聖朝屢從征伐每有功率以讓同列以是

弗克有祿既老而公代役洪武丁丑授蘇州衛百戶太宗皇帝舉兵南向公以敢勇遷隸前鋒大小十餘戰以功累陞指揮同知還守蘇州以計破走遼東兵解薊州圍受楮幣之賜既而攻濟寧獲其隊將進克東河陞指揮使又以肥河小河齊眉山泗州金川門捷功命世襲前職太宗皇帝正大位陞中都留守司都指揮僉事特留宿衛永樂庚寅扈駕征漠北拜輕車將軍師還命鎮山東未幾召赴行在掌神機營事尋又出備倭海上歲

庚子即墨高密妖盜倡亂衆慮其勢盛公獨以賊衆烏合急擊之即成擒遂晝夜倍道敗之於安丘俘其黨與以獻太宗皇帝大悅以勅勞之有運謀奮勇以寡擊衆可謂真將軍之褒遂陞山東都司都指揮使錫賚有加仁宗宣宗二聖臨御益隆委寄皇上嗣位以公宿勲老臣特陞都督僉事賜白金綵幣歲蝗旱公冒暑率官屬齋戒禱祈疽發髭間乃不暇顧既而病劇䟽于朝懇以受國委任弗克效報為言上遣醫視疾未至二日而公

卒矣實正統元年丙辰六月三日也訃聞上為之惻然
遣官諭祭賻卹其家仍勅有司塋葬公生洪武丙辰十
二月一日享年六十有一先配夫人沈氏繼配周氏李
氏咸有賢德子男十一人願穎顥預顥顏顥顯顥順
願娶趙氏顏娶何氏餘未有室女九人長閨秀適寧海
衛指揮董善次閨德適寧海衛百戶楊宗閨賢適靖海
衛指揮國晁閨善適成山衛指揮鄭某閨慶適登州衛
指揮許某閨明適登州衛指揮舍人韓福其三尚幼孫

女一以是歲十二月二十四日葬公于濟南歷城土山鵲華鄉之原夫人周氏諱智通瞿塘衛千戶福之女也世家鳳陽定遠生洪武癸亥六月二十二日自歸公勤內助孝于姑善訓其子頤穎顯顯夫人所出也夫人居公喪哀感成疾丁巳三月十二日卒享年五十有五至是將合葬于公之墓頤奉大理少卿沈君民望述公行實及夫人懿德之槩泣拜請銘嗚呼公為人個儻有氣槩沈毅有謀善騎射撫士卒如子弟家居則寬衣博

帶動有禮容尤孝于親嘗痛先公弗及終養奉母李氏
夫人飲食湯藥必嘗而進既卒哀毀骨立語周夫人曰
吾以職守義不得離爾携諸子奉吾母柩歸葬松江先
公之兆是能慰吾志矣夫人受命歸塋如禮鄉邦賢之
夫以公之忠孝夫人之淑德著於人者如此是皆不可
以不銘銘曰

烈烈衛公昔佐太宗龍興而雲虎嘯而風義旌一張天
兵奮舉公時在陣克殫心膂敵旅若林披靡勁勦摧枯

拉朽鋒孰敢當內難既平公有顯爵宿衛之留方面之
託妖寇肆興公實殄之帝命之嘉疇曰不宜列聖任公
始終一致崇階方躋奄忽捐世維公之生忠孝兩全矧
茲內助允矣其賢歷城之原山水佳麗刻辭貞珉用告
來裔

文敏集卷十八